

SAN PABLO KARTA FXILIPOS ÇXHABTEWE'SX JÏI

Pablo karcelte ũşxa Fxilipos çxhabte yakhthē'jtx fxi'jni

¹ Jesukristo's selpisáa Pablo vxite' Timoteo kwe'sxtha'w naa karta's fxi'jçxa kaja' Dxus luuçx Kristo Jesus yakh fxi'zesawe'sxtxi, Fxilipos çxhabte ũssa yakhthē'jwe'sx vxite' dxuus yatte jxkaahsawe'sx vxite' kxtee mjïi pu'çxa jxukaysatx weçxana. ² I'kwe'sxtxi' Dxusa' pu'çxhina vxite' kwe'sxtxi jxpe'jsa Jesukristowa, txãa pa'ga Dxus yakhçxáa mfxi'zewe.

Dxus yakh fxi'zesawe'sx pa'gate Pablo Dxus yakh puutx we'weni

³ Bagaçxtewa i'kwe'sxtxi yaakx iisath Dxusa's weçxa'. ⁴ Sa' i'kwe'sx jxukaysa pa'gate bagaçxtewa wala weçxana Dxus yakh puutx we'we'th. ⁵ Txãa pa'gatey ja'daçxah mjïisatha'w Dxus yuwe's pta'sxna nyafxiitey takhçxa açxpkaçx. ⁶ Aça' na'wē i'kwe'sx ew fxi'zewa'ja's Dxusa' i'kwe'sxtxi pu'çxya' takhku na' Jesukristo naa kiwete sxawedna kîhpkaçx pu'çxna nes yuuna txã'wē yūuwa'ja's ew jiith. ⁷ Adxa' Dxus yuwe's pta'sxpa'gaçxáa açxha' karcelte ũsthu. Nawa khuēs tasxte pa'yama'tx pějxya' nawa Dxus yuwe ewsa yuja' jïna pta'sxna nes yu'nja, txã'wēy i'kwe'sxwa tuuthe'j pu'çxna ũsi'kwe. Txãa pa'ga adxa' i'kwe'sxtxi iiméh wala

peeygāhna jxukaysatx peçxkanamée yajxna fxi'zete', wala weçxa yuja'. ⁸ Jesukristowa ma'wēga peeygāh txā'wēy adxwa i'kwe'sxtxi jxukaysatx iiméh wala peeygāani's Dxusa' jiia'. ⁹ Txāasath i'kwe'sx pa'gate Dxus yakh puutx we'wena pēyi' peeygāawa'ja's jweeíçxáa wala ji'phuçxa ma'wē fxi'zewa'ja'swa wala ew jii kīhte yuhwa jxpubakahmén, ¹⁰ kxah maa ewsatēwa jiyuçxa txā'sçxáa txhitxhçxa Dxus dxi'pte ew fxi'zeyā' ājāne'kwe. Aça' txā'wē fxi'zeçxa'. Kristo kīi ente' weh yuhwa yuuwe meesa yuune'kwe. ¹¹ Txā'wē yuukahn Jesukristo' jweeíçxáa wala pu'çxhina, i'kwe'sx ew yūuna fxi'zete' Dxusa' jweeíçxáa tuuthe'jni yuukahn.

Adx itxī fxi'zeni' jxuka Kristo jīi yuuçxá'

¹² Yakhthē'jwe'sx jiyukahn pta'sxya'wath: adxa's na'wē karcelte ūswa'j en pa'kh nawa txāa yu' jweeíçxáa Dxus yuwe's tuuthe'khanku txā'wē yuu. ¹³ Txāa pa'ga soldau jxukaysa maawa jxuka jiita' Kristo's selpiipa'gaçxáa preesu ūstēwa. ¹⁴ Aça' adxa' txā'wē preesu ūsçxawa Dxus yuwe's ūukhmée pta'sxiçte jiyuçxa', maa yakhthē'jwe'sxwa txā'wēy ūukhmeetx Dxusa's jweeíçxáa çxhāçxha yajxna pta'sxi'. ¹⁵⁻¹⁶ Maai' yu' adxa's açeyajkçxatx Kristo kaapiya'jni's pta'sxi', adxa' preesu yā'j ūste', jweeíçxáa kxūusu'j wēeçxa. ¹⁷ Naapkaçxha' vxite' adxa's pu'çxna ew yajkçxatx txā'wē yū'. Adx yu' preesu ūsçxawa Dxus yuwe yu'sa' ūukhmée pta'sxna ūstēwa jiiçxatx txāawe'sxwa ūukhmée ew yū'. ¹⁸ Adxa's açeyaakxsa ma'k yuu khīmeeçxa'

açeyaakxsamée ma'k yuu nawa Kristo kaapiya'jni's maatxwa pta'sxniçxáa ewna. Txãa pa'gath adxa' weçxá'.

¹⁹ Adx pa'gate i'kwe'sxa' Dvus yakh puutx we'wena ũsne'kwe, naapkaçxha' Dvus Espirituwa pu'çxte', preesu ũsçxawa ew kaseje'nja sũhnath wala weçxá'. ²⁰ Txãa pa'ga makwe preesu ũsçxawa weh yuhwa thaamemée, wejxwa Kristo yuuçxá's áate tuuthe'j wēeth. Nyafxíiwa ma'wētká tuuthe'je' áçxwa txã'wēyçxáa yu'nja. Txãa pa'ga makwe adx uuma'th meeçxa' uumeema'th nawa Kristo' tuuthe'jni nes yuuna. ²¹ Txãa pa'gatey naa kiwete adx ãtxĩ fxi'zenisa' jxuka Kristo jĩi yuuçxá', sa' uuçxa' Kristo yakh ũsya' u'jwa'jsath. ²² Txãa pa'ga ma'sna txhitxh wēeçxawa ája'çmeeth, txã'wē naa kiwete nee fxi'ze'ççxa', Kristona selpiina ũste', wala ewsaíçxá' naa pa'ga. ²³ Aça' txãa e'zsath txhitxhwa'ja' adx yakha' thēya'. Ki'kinte' uuni wejx ewna Kristo yakh ũsya' u'jni sũhnath yaaki'. ²⁴ Nawa naa kiwete nee ãtxĩ fxi'zeni wejx jxthaakwe peeja' i'kwe'sxtxi pu'çxna ũswa'j. ²⁵ Txãa pa'ga naa kiwete nee uumey i'kwe'sxtxi pu'çxna ũswa'j ji'phíçxáath, Dvus yakh çxhãçxha fxi'zekahn. ²⁶ Aça' i'kwe'sxa' na'wē adxa's nee ũs jxthãasu'i'kwe aça' Dvus pu'çxte' pa'ja'nja, Kristo Jesusa's weçxawa'ja's ji'phukahn.

²⁷ Kristo kaapiya'jniçxá's kxtey yuuna mfxi'zewe. Aça' bagaçxteçxáawa adx thegya' pa'jma'th meeçxa' pa'jmeema'th nawa Dvusçxá's çxhãçxha yajkxna teeçxsa na'wēçxah jxukaysa

Dxus yuwe's pta'sxna pa'pçxuna ũsta' jñiçxá's jiyu wēeth. ²⁸ Sa' açesawe'sxtxi ma'wē yuhwa ũukhmée mfxi'zewe. Txāawe'sxa' jxukate vxituwa'jsaçxah txā'wē açetxna, naapkaçxha' i'kwe'sx ũukhmée fxi'zesa' Dxus nwe'wenisaçxah txā'wē ũukhmeene'kwe. ²⁹ Txāa pa'ga Kristo's jxpa'gasa yā'ja' Dxus yakh wēt fxi'zewa'ja'sçxáa weçxana jxpa'gamée, Kristo's selpiipa'ga naa kiwete thēyte nxuste fxi'zewa'ja'swa weçxana jxpa'gawa'ja'. ³⁰ Adxwa ma'wētkā açeni fxi'ze nyafxí', sa' āçxwa txā'wēyçxáa açeni ũsthu txā'sa' jii i'kwe, açā' i'kwe'sxwa txā'wēy adx yakh ja'daçxah yahçena ũsi'kwe.

2

Kristo' āhmeekwesa na'wē yuuçxawa thaakwe walasa yuuna pa'jni

¹ I'kwe'sxtxi na'wēth yu'kxpeje': Kristo peeygāanisa Dxus Espiritu's ũuste ji'phdxihçxa', txajx kvxiisxa'jni kçxhāaçxha'jni mfxi'zewe, ² teeçxsa na'wēçxah puutx ya'peeygāhna, teeçxsa na'wēçxaçxáa yajkxna. Aça' txā'wē fxi'zeçta' jñi's jiyuçxa', adxa' wala weçxa'nja.

³ Iiwejçx yajkxna peekx wēt fxi'zewa'jçxá's yaakxwa'jme', wejxwa iiwejçx yajkxmée vxitesatx jxthaakwe tuhthesa' sūhna txāawe'sxtxi ewçxáa yūuna mfxi'zewe. ⁴ Txā'wē peekx wēt fxi'zewa'jçxá's yajkxmée, wejxwa vxitesatx puçxna mfxi'zewe ew fxi'zewa'ja's txāawe'sxwa jiyukahn.

⁵ Kristo' na'wêk yũuya' yajkx txã'sna i'kwe'sx mji'phuwe: ⁶ Kristo' Dxusíiçxáak yu', nawa Dxus txakwe seena' wala jxtuhthesath sũhwa'j yu'sa' ji'phumée, ⁷ txã'wê yaakxwa'ja's jxuka nvxihtçxa kwe'sx ähmeekwesa na'wê yuuçxak selpiiya' yajkx. ⁸ Txãasak ähmeekwesa na'wê yuuna pa'jçxa nxus nxus kluuste uuwa'ja'swa ji'phu, Dxusna nwêese'jçxa. ⁹ Txã'wê yũupa'gak Dxusa' cielun pe'jna u'jçxa maatewa jxthaakwe tuhthesa vxitçxa ki'p jxkaahwa'jsa. ¹⁰ Aça' cielute ũssa vxite' naa kiwete ũssa vxite' mtee mteewe'sxwa jxuka Jesus tasxteçxaçxáa pee-jxũkweçxa ¹¹ na'jĩtxna: Jesukristo yuuçxáa maatewa jxthaakwe jxkaahwa'jsa' jĩna Dxusa's weçxaatxna.

Dxusa's jiisa' naa kiwete eena' kweethna fxi'zewa'ja'

¹² Adx yakhthê'jwe'sx yaakxnisatx na'wêth yu'kxpeje': i'kwe'sx yakh adx kxtee ũçxa kaapiya'jni's wa'lmée i'kwe jxuka kxtey nwêese'je'. Txãasa äçxha' jweeiçxáa çxhãçxha Dxusa's yajkxna meswe, jxpubamée fxi'zewa'ja's pa'pçxuna, makwe adx yu' jxu'the ũstewa. ¹³ Txãa pa'gatey txã'wê ew yũuna fxi'zewa'ja's Dxusku kaaũusuthe'je', txajx jxthãasni's kxtey yuuna fxi'zekahn.

¹⁴ Kĩhtewa jxuka ewçxáa myũuwe nuywe'wena puimée. ¹⁵ Txã'wê ewçxáa yũute', kim yuhwa i'kwe'sxtxi yuuwesa ewmeesata' jĩya' äjãmeetxna, wejxwa Dxus luuçx yuh yu'ta' yuuwemeesa jĩnaçxáa we'wetxna, makwe naa kiwete nasa ewmeesa ksxavxyte ũstewa. Aça'

i'kwe'sxa' eena' kweethsa na'wě mfxi'zewe txāawe'sx ksxavxyte, ¹⁶ Dxus yuwe itxī kaafxi'ze'jwa'ja's mtee mteewa pta'sxna. Aça' naa kiwete Kristo kīhte', adxa' kxulmeetka pa'pçxuna mjī sūhna wēt wēt yaaki'nja i'kwe'sx txā'wě ew yūuna fxi'zepa'ga. ¹⁷ Txāasath ūukhmée mjī', makwe adx itxī fxi'zeni's ivxiituwa'j ma'k yuu i'kwe'sx pa'gate Dxusna selpiipa'ga, nawa txā'sa' ūukhmée weçxana kxtey yuuya' ūsthu. Txā'wě adx weçxani'sthu i'kwe'sx jxukaysatx pta'sxi', ¹⁸ adx na'wěy ūukhmée weçxana ūskahn.

Timoteo vxite' Epafxrodito yakh kaahni

¹⁹ I'kwe'sx ma'wě fxi'zena ūstewa jiyuça weçxana ūsya', Dxus pu'çxte' Timoteo's dud kaja'nja i'kwe'sxtxi thegya' sūju'th. ²⁰ Txā'wěme', adx na'wěy i'kwe'sx pa'gate pa'pçxusa vxite yu' ji'phmeeth. ²¹ Vxite yu' ūsçxawa, peekx wēt fxi'zewa'jçxá'stxi yaaki', Kristo Jesus jxthāasni yu'sa' yajkxmée. ²² Nawa Timoteo' txā'wě yu'çme'. I'kwe'sxa' jiiyā'ji'kwe ma'wěga wala selpii Dxus yuwe's adx yakh pta'sx pu'çxna, peekx luuçx ma'wě neya's pu'çxhikx txā'wěk yūu. ²³ Txāa pa'ga adxa's kīh yūuya'watewa jiyuna'wa, Timoteo's dud kaja'nja i'kwe'sxtxi pta'sxya'. ²⁴ Meeçxa' adx yuu i'kwe'sxtxi thegya' yuhwaça', sūhçxa Dxusçxá'sthu neewe'we'.

²⁵ Yakhthē'j Epafxrodito's i'kwe'sxa' kaahne'kwe adx peejinitx ktū'se'jçxa aça' ayte ūsa', adxa's pu'çxna pxthaa yuuna. Aça' txā'swa kaja'nja sūjū'th. ²⁶ Txā'wě txajx āçā'ni's

i'kwe'sxwa jiyutx jīni's wēsē'jçxa', txā' i'kwe'sx yakh wala puutx uy wēje'k, txāasak wala kuh yaaki'. ²⁷ Isa āçā'na weteçxa', uuwa'theçxáa yā'kh ūsu'. Nawa Dxusa' txā'sa' pu'çxku. Sa' txā'sçxáana pu'çxmée, adxnawa txā'wēyku pu'çx, na'wē nxusna ūsthu txāate jxthaakwe nxussa pa'khamén. ²⁸ Txāa pa'ga txā'sa' dud kaja'nja sūju'th, txāa yakh i'kwe'sx puutx uyçxa' weçxana ūskahn. Aça' i'kwe'sx weçxana ūste', adxwa nxusmée weçxana ūsu'nja. ²⁹ Txāa yakhtē'ja's wala weçxana mpa'gawe, sa' txāa na'wēysatxi's багаçxtewa mpeeygāhwe. ³⁰ Txāa yakhtē'ja' Kristo's selpiipa'gaçxáa txajx ĭtxī fxi'zeni's ivxiitu'dxijk, txā'wē i'kwe'sx yu' adxa's pu'çxya' ājāmeetewa, txāa yu' adxa's selpiina ūsçxak txā'wē u'dxih.

3

Dxus dxi'pte ew fxi'zewa'ja's Dxus iūçxáak ūsu'

¹ Āçxha', yakhtē'jwe'sx, Dxus yakh weçxana mfxi'zewe. Nyafxīi neewe'wena fxi'th txā'wēyçxáa āçxwa neewe'weçthu, i'kwe'sxtxi' selpiwa'jsa' naa pa'ga. ² Nasa ewmeesa kaypuba'jna fxi'zesatxi's mpa'yajkxwe, peekx kakwetewe'sxa's spē'thsatx. ³ Ew jiyute yu', Dxusa's ūusuh jxuka yajkçxa neewe'wesa kwe'sx txā'wē Dxus luuçx cirkuncidāynisatha'w. Txāa pa'gatey Kristo Jesus jīi yā'tha'w sūhçxa weçxanatha'w fxi'ze' naa pa'ga. Sa' kwe'sx ājāni kakwekhēwe'sxa's weeçx yajkxna fxi'ze'çmeetha'w. ⁴ Txāatx yaakx wēewaç yu', adxwa weeçx yajkxya' āja'nja, kintewa

jxthaakwesath naa pa'ga. ⁵ Adx āaga yuuni oçxo en yuuçpkaçxha', cirkuncidāynisath. Sa' Israel nasath, Benjamin ji'th. Sa' mama tutxhu kasejii hebreo nwe'sxthu yu', tatawe'sxa' judiutx yu' txāa pa'ga. Khīçxawa adxa' fxariseoth yu', judiuwe'sx ley ma'wē jxkaathewa jxuka kxteythu yuuna fxi'zesa yu'. ⁶ Txāasath ley kaapiya'jni's nwēese'jna Kristo nasatxi's ikhya' pakwé', Dxusna selpiiçthu sūhçxa. Aça' adxa's kim yuhwa ley jxkaahni's kxtey yuume' jīya' ājāmeetxna.

⁷ Nyafxii yu' txā'wēsa' adx yakha' seena' yuh wala ewsa yu'tx. Nawa āçxha' Kristo's jxpa'ganijū' txā'wēsa' kīhte yuhwa seelpimeetx yuuna pa'j. ⁸ Āçxha' Kristo Jesusna ew jiyuwa'j wejx jxthaakwe wala ewsa', naa pa'ga txā'wēsaxi' jxuka nvxihtçxath fxi'ze'. Kristoçxá's selpiina fxi'ze wēeçxa kījīhnawa jxuka nvxihtthu seelpimeesatxi's, txāa yakh yuuçxáa fxi'zeya'. ⁹ Txā'wē ley jxkaahni's kxtey nwēese'jçxa ew fxi'zewa'ja's ji'phumeeth. Txā'wē ew fxi'zewa'ja's Dxusku ūs, Kristo's ūusuh jxuka yaakxpa'ga. ¹⁰ Txāasa Kristo yuuçxá's ew jiyuçxa txāa ma'wēne' uuçxa ki' itxī yuu txā'wēy yuu wēeth. Sa' txāa na'wēy pxthaa yuuçxa uuwa'jnawa ji'phuçxa, ¹¹ uunijūwa ki' itxī yu'nja sūjū'th.

Dxus dxi'pte ewsa yuuna pajwa'ja's pakwena nes yuuni

¹² Txā'wē Kristo's jxuka jiyā'th jī'çmeeth, sa' Dxus dxi'pte ewsayā'th sūju'çwameeth. Nawa txā'wē yūuwa'ja's ājā'nja sūhnaçxáath

pa'pçxuna nes yu'. Kristo Jesusa' adxa's txãa jïik vxitna pa'j aç'a' ãçxha' adxa' Kristo jïith sũhnaçxáath pa'pçxuna fxi'ze'.
¹³ Yakhthê'jwe'sxtxi na'jï'th na': Kristo's jiyuwa'j peejiçxáath sa' Dxus dxi'pte ew fxi'zena pa'jwa'j peejiçxá' sũjũ'th. Aç'a' txãatx kxtey yuu wêeçxa na'wêth yũ': nyafxíi fxi'zeni's peçxkanaçxa, na'wê jiyuna jxã'jwa'j ũsta' txãaçxáatxthu wejx pa'pçxu'.
¹⁴ Txãatx jxuka ew jiyuna pa'jçxa', Kristo Jesus tasxte ũsya' Dxus pa'yak kxtee ũsu'nja sũjũ'th.

¹⁵ Dxusa's ewyã'j jiisa' jxukaysa na'wê pta'sxi'th txã'wêçxaçxáa yaakxwa'j ji'ptha'w. Meeçxa' jxpubawá'kwe nawa Dxusa' ew áate kaajiyu'juna.
¹⁶ Na'wê Dxus yakh ew fxi'zewa'ja's jiiyã'tha'w txã'sa' peçxkanamée kxtey yuuna fxi'zewa'j ji'ptha'w.

¹⁷ Yakhthê'jwe'sx, adx na'wêy mfxi'zewe. I'kwe'sxtxiwa ma'wêtkaw' kaapiya'j txã'wêy vxite yakhthê'jwa ũsta' ew fxi'zesa, aç'a' txãawe'sx na'wêy mfxi'zewe.
¹⁸ Wala kujus iipta'sxyã'th, nawa ki' peena pta'sxiçthu ũ'nena: maaíi yu' Kristo kluuste uuni's açesa ũsta'.
¹⁹ Txãawe'sxa' ũ'wa'ja's yuuçxáa dxus na'wê yajxna fxi'zesata', sa' thaamewa'ja's yaakipkaçxte thaampa'su yu' iivejçx yaakxsaçxáata'. Nawa nmehte' jxuka ivxiituni yuutxna.
²⁰ Naapkaçxha' kwe'sx yu' cielute ũswa'jsatha'w. Txãasa ũythasna ũstha'w, kwe'sxtxi nwe'wesa Jesukristo cielujũ kïijana sũhna.
²¹ Txã' kwe'sx kakwe seelpimeesa's yu'pthehçxa, txajx kakwe na'wêy

ewsawxvituna, Kristo' ma'wẽ yũuwa'ja'swa jxuka
ãjãwa'jsa' naa pa'ga.

4

Pejka Dxus yakh yuuçxáa weçxana mfxi'zewe

¹ Adx yakthẽ'jwe'sxtxi yajkxte', wala weçxa
yuja', Dxus yuwe's jiyuçxa jxpubamée ũste'.
Aça' i'kwe'sxtxi wala peeygãhna neewe'we'th:
Dxusna peçxkanamée çxhãçxha yajkxna meswe.

² Ewodia vxite' Síntike txãawe'sxa' e'zii
Dxusa's ũuste jxpa'gaçxa fxi'zeççxa', puimée
fxi'zekahnthu neewe'we'. ³ Sa' txãa e'z u'ytxi's
yu'kxpejkahn idxna neewe'weçthu, adx yakh
mjii pu'çxna u'jusag naa pa'ga. Txãa e'z
u'ywe'sxa' nyafxíia' adx yakh Dxus yuwe's wala
pta'sx pu'çxtxi, Klemente vxite' adx yakh mjii
pu'çxsawe'sx yã'jçxa. Aça' txãawe'sx yase'
fxi'jni yã'j ũsta' bagaçxte yuhwa uuwa'jmée ãtxĩ
fxi'zewa'j librute.

⁴ Dxusna çxhãçxha yajkxna fxi'zeççxa', weçx
weçxa yajkxna mfxi'zewe. I'kwe'sxtxi peena
neewe'weçthu, weçx weçxa fxi'zekahn. ⁵ Kxah
maawa i'kwe'sx ew yũuna fxi'zeni's jiyukahn,
i'kwe'sxa' Dxus yakh ew fxi'zewa'j yuuçxá's
pa'pçxuna meswe, Kristo kãwa'ja' ãjaçyã'ja' naa
pa'ga.

⁶ Weh yuhwa nxusmée, wejxwa Dxusçxáana
neewe'wena meswe. Kĩh peejçxawa, txã'sna
jxuka mpẽjxwe weçxana. ⁷ Txã'wẽ yũute',
Dxusa' ũsuna ũuste wẽt yaakxwa'j seena'
walasa's. Aça' ũuste wẽt yaakxwa'ja's
jxpa'gate', wala yuh weçxa yuja'. Txã'wẽ Dxus

ũsni ũuste wēt yaakxni's ew āate pta'sxya' ya'āja'çme', txã'wě seena' walasa pa'ga. Txãa wēt yaakxwa'ja's jxpa'gasayã'ja', Kristo Jesus yakh wētçxáa yajkxna fxi'zene'kwe.

Dxus dxi'pte ew fxi'zewa'jçxá's yajkxna fxi'zeni

⁸ Yakthē'jwe'sx na'wě yajkxna fxi'zekahn neewe'weçxa nmeh nvxiituçthu: kĭjkĭhwa i'kwe'sx ũuste suwwa'jsamée ew Dxus dxi'pte kaafxi'ze'jwa'jsa yuuçxá's mpa'pçxuwe, ĩsxiimée isasaçxá's we'wena, ewçxáa yũuna kĭhtewa jxpubamée. ⁹ Adx kaapiya'jnıtx ũusuh jxuka jxpa'gaçxa ũsçxa' txãatxi' kxtey yuuna mfxi'zewe. Adx ma'wě jxkaahçxa' ki' ma'wēne'tka yũuna fxi'ze txãatxi' txã'wěy myũuwe. Aça' i'kwe'sx ũuste wēt yaakxwa'ja's ũssa Dxusa' i'kwe'sx yakh nes yuuna.

Fxiliposwe'sx Pablo's ofxreda peesni

¹⁰ I'kwe'sxa' adxa's ki' yaakxpa'ga adxa' wala weçxa'th. Nyafxi' peçxkanane'kwe sũhçxa txã'jĩ'çmeeth. Txã'wě peçxkanameeçxawa pu'çxya'çxáa ne'kwe ājāmée ũsu' sũjũ'th. ¹¹ Kĭhwa ji'phmée peejiinath ũsu' jĩçxa txã'jĩ'çmeeth. Txãa pa'gatey adxa' piyath kĭjkuē ji'phuni yakhçxáawa weçxana fxi'zeya'. ¹² Kĭh yuhwa ji'phmée fxi'zeni's jiith, sa' wala ji'ph fxi'zeni'swa jiith. Txik ũswa'j ma'k yuu meeçxa' wēena fxi'zewa'j ma'k yuu nawa ma'wě fxi'zewa'j en pa'thewa maa sũhmée ũsya'th piya. Kĭhwa pejiima'th pejiimeema'th nawa txã'wě fxi'zewa'ja's jxuka piyath. ¹³ Txãa pa'gatey naa kiwete makwe wala thēysa nxussa pa'thewa,

Kristo yuuxáak pu'çxna nes yu', çxhãçxha kaafxi'ze'jna. ¹⁴ Makwe txã'wětewa, i'kwe'sxa' ew i'kwe yũu, adx peejiina fxi'zeni's pu'çxna.

¹⁵ Adx nyafxçxah Macedoniasu Dxus yuwe's pta'sxya' u'jweçte', adxa's kim yuhwa pu'çxmeetewa, i'kwe'sx yuuxáa i'kwe adx peejini's pu'çxna kaah, adxa' i'kwe'sxtxi kaapiya'th Dxus yakh fxi'zewa'ja's naa pa'ga.

¹⁶ Sa' adx Tesalonikate nee ũsiyna i'kwe'sxa' ki' vxyuu kaaji'kwe adx peejini's pu'çxna.

¹⁷ Txã'wě adxna kîhçxáawa peeste', txã'sna jxpa'gawa'jçxá's yajkxna fxi'ze'çmeeth, wejxwa txã'wě yũupa'ga Dxusa' jweeíçxáa wala peesuna i'kwe'sxtxi's sũhnaçxáath yaaki'.

¹⁸ Epafxrodito yakh vxyuu kaakhwe txãaçxáa adx peejinite jxthaakweyã'ja'. Txãa peesya' kaahnisa' Dxus dxi'pte iiméh wala ewsa yu'k, Dxusa's weçxana peesnisa ne' yu' naa pa'ga.

¹⁹ Aça' adx Dxusa' i'kwe'sx kîh peejiina ũstewa, jxuka ũsuna pejiikahmén, txãa pa'gatey Kristo Jesusa's jxpa'gani'jũ' Dxus jii yu'sa' kîh yuhwa peejxmée jxukak ya'jypa'ga'. ²⁰ Txãa pa'ga kwe'sx Tata cielute ũssa's weçxana nes yuuwa'ja' bagaçxtewa.

Dxus luuçx jxukaysatx yuwe weçxaa kaahni

²¹ Dxus luuçx jxukaysatx yuwe mweeçxawe, Kristo Jesus yakh fxi'zesawe'sxtxi. Txã'wěy adx yakh ũsa yakhthě'jwe'sxwa yuwe weçxaa kaja'tx. ²² Sa' Dxus luuçx Cesar tasxte selpiina ũssawa jxukaysa yuwe weçxaa kaja'tx.

²³ Kwe'sxtxi jxpe'jsa Jesukristo' i'kwe'sxtxi' pu'çxhina ewçxáa kaafxi'ze'jna.

Dyus Yuwe U'sesa
Páez: Dyus Yuwe U'sesa New Testament

copyright © 2011 Wycliffe Bible Translators, Inc.

Language: (Páez)

Contributor: Wycliffe Bible Translators, Inc.

All rights reserved.

2020-11-30

PDF generated using Haiola and XeLaTeX on 21 Feb 2024 from source
files dated 29 Jan 2022

06da09f4-8d0f-5001-ae8c-0e6aa0131ffd